

<b>Zeitschrift:</b>	Annalas da la Societad Retorumantscha
<b>Herausgeber:</b>	Societad Retorumantscha
<b>Band:</b>	25 (1911)
<b>Artikel:</b>	Memoria infortuniorum : vel nota dallas famosas disfurtünas dvantadas in Engiadina, principalmaing in Susch, in ils onns 1750, 1762, 1772 et 1831
<b>Autor:</b>	Planta, C.
<b>DOI:</b>	<a href="https://doi.org/10.5169/seals-188560">https://doi.org/10.5169/seals-188560</a>

### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### Conditions d'utilisation


L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 11.08.2025

**ETH-Bibliothek Zürich, E-Periodica, <https://www.e-periodica.ch>**



# Memoria infotuniorum

vel nota dallas famosas disfurtünas dvantadas in Engiadina, principalmaing in Susch, in ils onns 1750, 1762, 1772 et 1831.



## INTRODUCZIUN.



vant qualche temp chattet l' infrascrit tanter scrittüras veglias in ün archiv a Susch duos manuscrits, chi depingian detagliadamaing ils desasters causats in Engiadina tras las forzas elementaras dell' aua e del fö in temps vegls, nomnadamaing in Susch. Gnand quaist comün nel an 1772 visità da dobla disgrazcha, nempe d' ün grand incendi in «Surpunt» e d' üna spaventusa auazun, schi as decidet ün giuven abitant da quel, cioè Ulrich Planta, in allura stüdent da theologia, plü tard minister a Peist, Soglio, Castasegnä, Valchava, Zernez e Susch († 1830), da notar «segond la simplicitad» quels evenimaints remarcabels per la posterità. Profittand dell' occasiun depinget el in ün' aggiunta eir diversas auazuns antecedaintas, per Susch na main desastrusas, postüt quellas dels ans 1750 e 1762. Nel an 1831 ha aggiunt mastral Jon J. Planta, neiv del surnomnà e bapsegner del infrascrit editur, üna descripziun dellas devastaziuns causadas in quel an tras la Susasca. Supponind cha quaistas notizias veglias interessan eir ils lectuors dellas Annalas e surtuot ils abitants dellas comunitads, chi han soffert il pü ferm tras las disgrazchas depintas, stimettans indichà da publichar ils duos venerabels documaints nel periodic da nossa società reto-romantscha. Nella terza annada da quel (1888) chatta

il lectur üna descripziun fich interessantä dels desasters dell' auazun del an 1772 a Chamuas-ch, publichada da Chr. P. Muretsan.

L' ortografia, chi ais bainissem differenta dall' ortografia uossa üsitada, compara quia prezisamaing confuorma a quella dels duos manuscrits.

*Coira, 1 Avrigl 1910.*

*C. PLANTA.*

\* \* \*

## I.

Haviond nos pövel, in seis ordinari esser e charnal bainstar e salüd, saimper persistü in seis cumüns e specials vizis e mantunà puchiats sün puchiats, schi per tal causa Dieu 'ns ha visità primariamaing cun ün furius *incendi in Surpunt*, Ao 1772 die 19 da julio.

Circa las uras 10 o 11, intant cha la glieut feivan cun fain in Sandöngia e cha dimena quasi tot la glieut suo davent dal comün, schi tschüffet fö in la chasa da Simon Rest aint il chamin in tal maniera cha bain bod suo à fö quasi tot il circuit, eha in duos uras suo bunamaing tot ars, dond il vent a val. Blers nun pudenn tour or' ingotta. A blers ngit bler invulà. Pero tras singulara grazcha e benevola providentia dal Senger nun suo fat don ad ingün animal vivaint e neir al Taimpel. Ma in il circuit cumanzond dalla e cun la chasa da Jon M. Carl e da quella vart gio fin al extrem da Surpunt, e dal otra vart sü fin la chasa da maschel Fort Cazin, statta da Barbla Nuolf, es ars tot. Tot insembel 22 tets.

Pero non ha bastà da pitschen chastiamaint. Anzi es succedü ün oter plü grond, al qual sco eir al incendi han precedü prodigius comets: succedond dimena üna spaventabla *aguazun* od *inondaziun*, nempe die 6 da settembre 1772. Haviond il di e la not avant pluü da contin a tschel rot, schi s' rumpenn ora dapertot da süsom l' Engadina infin josom, dalla vart dretta dalla val, flüms e boudas. In Camogast l' aua da la val mettet in grava quasi tot il cumün, et alchünas chasas fuon da fond oura extirpadas. L' medem in oters lous, pustüt in Cernetz. Ma üna dallas plü

terriblas boudas crudet in Susch nel conteng d' prememorata Sandöngia. Causa las grondas plövgias e la materia e grippa marscha, et essendo quigo eir il vieu plain d'materia, es ngü gio cun la bler agua cunter il natüral concept üna tal bouda, sco, malavita! l' aspet mossaa. In quel stupend conteng da prada, chi da vegl s'extendeiva infin sü al pè del munt Crapalb, ha la bouda possanta devastà spazi da 180 chiarra d' fain. Imposibiel da restituir e remetter tal fond in seis anterius stadi, haviond la bouda manà na solum glera, siblun e littaa, ma eir peidras grondas sco pignas, fin our ils plans. Similas boudas sun ngüdas gio eir dasper Ardez et in oters lous. Quellas han augmentà e fortifichà il flüm sur masüra, e l'agua eira ngüd' a tal grondezza, chia solum in Susch in tscherts lous figüreivan lais. Nel conteng Davoplattas eira inondà ils êrs infin via prol mür d' Uoschla Cl. Rumbella. Et eir la prada da Salet eira suot agua. Usche stuvevan necessariamaing s' render eir las punts, allas qualas il sforz dal agua, tscheps e crappa incauseivan vehementa violatiun. In tal esser l'agua ha manà via quant bleras sumptuosas e custaivlas punts in tot l'Engadina, da süsom infin a Pont Martina, ultra ils donns irreparabels gio 'l Tyrol fin al flüm Donubio. L'ha manà via in l'Engadina 27 punts e que las plü bunas e novas, laschond star las veglias e marschas. Usche gienn quel di las punts da Zutz e Madulain, in Cernetz la punt d' Arduond e l' otra sper la chasa da maschel Bart. Salis. In Susch la punt d' Baselgia passet s' alvantond intera, et usche eir otras gio per val in diversas circonstantias. Ma non basta dà que, anzi l'ha manà davent in l'Engadina bassa bler fond, prats et êrs, la quala chiaussa fet ngnir l'agua talmaing spessa, ch' ella in diversas rivêras ladas ha laschà davo glera, siblun e littaa. Cun da quella rüzcha bler fond et eir il vieu es compli. Odur da suolper munteiva sü dal flüm. In Susch, ingio 'l cumün es quasi in mez l'agua, eira, gnond da Plaz sot in sü, tot la terza inondada. Chi manev' or dallas stallas mnadüras, charra, sternüm, chi vaschella, crötschs, flianás, item da tuotta sort mobiliás, e'l flüm incontrá impliva las chasas cun siblun e littaa, gieva gio per la via aut infin las portas, maneva davent tot il linom dallas vias, sco eir saivs et orts. Item es passà via bler fond in Cernetz, Susch e Lavin, da pretsch incal-

culabel, fond da Cernetz in ils Praschitschs, da Susch in divers lous, ma specialmaing eir il mür del sunteri. Haviond maglià sot aint, fet l'agua crodar il mür e manet davent eir üna part dal sunteri, bler ossa e trais vaschess. Plü ha 'la miss in privel las duos chasas vicinas e la tuor e demoli del tot duos chasas chia 'l fö haveiva demoli be a mezzas. Progredind in quel circuit ha 'la tut bler fond in Aguetta e Chantsot, in Sotruina duos ers et il plan, nun laschond da quels nianca fastizi. In Raila passenn via plüs êrs; ingio quels eiran, es uossa il Dieu dal agua. In Runzatz sot la via oura üna lunga strivla d'êrs es ida cun il flüm, plü eir üna ampla part della via, usche chia ingio la via passeva, es uossa il transit dal agua. Plü sün manadas via in Susch quantas stallas e tablats, cioè trais sper la punt d'Baselgia. In duos chiasas fuo alvantà las quartas d'fain, pro otras crudenn tocks dal mür, e da blera sort donn fuo causà, qual nun convain da requintar. In Cernetz l'agua dal Fuorn hat fat donn a duos chasas sper la punt. Item in Lavin bler e bel fond d'ambas oppostas varts fuo victima dal torrent insaziabel, solum ad ün sulet possessur gienn in malura prats et êrs in valur da plü co 1000 renschs. In Ftan ha il flüm danizà solum il comünavel, cioè la pas-chüra. In Scuol, ultra oter grond donn, es svani ün conteng d'prada da totta bellezza, da valur da trais renschs il pass. Eir ils da Ramosch plondschan da donns excessivs; plü in gio fuo miss in privel chiasas da Strada et il comünét da Sclamischot.

Passada l'aguazun han ils da Susch tras indolentia e gronda trascurantia laschè dar gio il sunteri, il mür e mez la terra fin al fundamaint del clukèr, cun circa 16 vaschess. Ün ils ha stuvü tour sü e sepulir insembel cun l'otra ossa. In tal accidaient s'ha stovü restaurar e restabilir mür e cuntschet et imponder seguond il podair del cumün ün cuost grandissem. Eir la chasa vicina suffrit grond donn, aviond il flüm tut ils cuntschets et il huört e fat dar gio ün mür dalla stalla e schler suot il tablà.

Uschea vezzain che Dieu ha savü e podü far tras sia miracolusa potentia e seis jüsts jüdizis in specie dal agua, la qual' el per castigar ha duvrà diversas voutas (ultra oters metz, cioè da guerra, sco l'ais scrit in las chronicas da Sprecher, Guler et Ulricus Campellius).

Campell tom. I. cap. 6 scriva chia *Ao 1550* die 18 Septembre suo üna *inondatiun* sco chia ingüna etad nun s' regordeva d' havair vis. Eir quella vouta l'agua ha manà davent, sco Campell scriva, 27 punts be in Engadina, tanter otras eir la punt d' Baselgia in Susch. Et in quel accidaient perit la donna del chronist passond la punt in il momaint chia l'agua l' alvantet.

L'inundatiun dal on 1676 suo pock remarquable.

Ma *Ao 1750* suo darcheug üna furiosa *aguazun*, pero solum in *Susch* danneivla. Quella manet davent mia chiasa, et avant quista la punt dalla stadaira (sic dicta), la quala absente suo causa dalla deperdita dalla chiasa da sar Jon dalla Tuor Rosler, dalla quala ün tschep ngnit e pilget ora o volvet via il balcun tort. Ma la chiaussa memorabla pro quell' *aguazun* es il fat, chia sar mastral Jachen Curdin Rosler (cuius et cui vide epigramma)\* vuliond passar sur la punt via per verer da sa chasa fo manà davent cun la punt insembel et dopo chiatà gio'l Tyrol in Prot.

Item 12 onns davo es stat amo üna tala *aguazun* da nossa val Fliöla, nempe *Ao 1762*, ingio suo üna spaventabla uonda, chi pilget via bler in nossa comunità. Las bleras plövgias avevan incausà boudas in tot la val, mo specialmaing in Fratta, e plü 'n oura la detestabla bouda d'Sassè. Quell' *aguazun* pilget davent prada da Mundaditsch, la chiasa dalla tinturia, fet don alla chiasa del sar Reverendo Joseph Planta\*\* (nunc temporis da sar Adolph) et in pari temp eir vidvart il vieu, piglond l'jral dal mulin sot la reisgia, duos mulins sper la chasa da Mengia D. Roseli, cun üna piglotta da Tomas P. Cazin et il tablà da prefatta cun tot la mobilia e victu chi eira laint. Quels edificis pilget' la gio d' pè interamaing, da fond oura. Plü ha 'la ragischà davent la chiasa e tablà dal signur Doctor Johannes Planta insembel cun ils cuntschets, saivs et hotts e quartins suravart, in summa dapertuot slargià et ingravà il vieu.

\* Con quaista annotaziun latina l'autur as referescha probabelmaing ad üna elegia, chi ais conservada in ün manuscrit da nossa bibliotheca chantunala (Suppl. I Manuscr. 79) e porta il titul: «Üna nova chanzun fata sopra la non spetada, pero beada mort del honorat sabi et prudaint signur Landamma Jacob Curadin Rosler, p. m.» (Annotaziun del editur.)

\*\* Quaist Joseph Planta ais stat minister a Stampa. (Annotaziun del editur.)

Per precavir oters donns chi podessan occuorrer da quellas varts, fuo consultà dal cumün, casu necessitatis, da far cuntschets dalla peidra grossa in oura et eir vidvart sot ils mulins a munitiun da quels, dalla reisgia e dalla fuschina. Percio havidond da stuvair far ils cuntschets, schi fuo smers la laina sco üsità nel guat licit da cumün, ün dals quals eira in Arpilgas. Gnond dimena smers la laina dvantet ün accidaient circa üna persuna da professiun Flösser, nempe Casper Perl oriund da Lavin: s' rechattond sper üna peidra e nun pudiond mütschar causa la peidra, gnit ün lain e'l smachet la cossa d'üna vart in tal möd ch'el suo pers via. Manà a chasa, ha 'l vivü traïs dits. Nun podiond causa il manguel da meidis perits star avant al mal, schi subintret il Brand, dal qual suo consumpt.

Usche naj vlü scriver quaistas memoriablas disfotünas insembel cun lur adjuncta. Eir dopo quella dal onn 1772 sun stattas amo quantas in nossa val, las qualas han fat ailch donn mo-brich remarquable. Quist m' ha parü degn da scriver e notar per la posteridad. Blers oters accidaints, solum in spazi da 30 onns, fossan da quintar e comunichiar, sco specialmaing l'incendi dal guat Prad' guat, in il qual sun restadas duos persunas, et eir oters incendis solum da nossa comunità Susch, sainza historias politicas et otras, ma quels sun amo in memoria d'iminch' ün, an vero da blers.

L'ais scrit segond la simplicitad da .... me

*Susch, Ao 1774, die 10 Maji.*

*ULRICO PLANTA.*

\* \* \*

## II.

*Anno 1831* nella not dals 10 als 11 d'Aguost ais noss-pover cumün Susch darcheug dal omnipotent et 'jüst Dieu visità cun üna *aguazun* our da nossa val Fliöla. Al accreschimaint dall' agua ha precedü üna plövgia cregnia chi ha dürà non interrottamaing 24 horas. A quaista plövgia han precedü dits chiods e domeistis, per il che eir ils vadrets rendeivan blera e furiosa agua. Tuottas duos circumstantias effettuettan ün grond accreschimaint dall' agua,

da maniera ch'ella gieiva sur ils cuntschets aint e tendscheiva sün la punt d'stadaira. Eir batteiv' la cunter il mulin aintasom Grava. Quaist eira il stadi da ditta agua la saira amo da di als 10 Aguost. Sün quella ais segui üna dolorusa e spaventusa not. Ditt' agua, cumbain ch' ella eira na be gronda sco sura dit, dimpersai amo creschüda vi per la not, non avess podü causar la desolatiun sotnotada, scha nun havess cun tala grondezza e rapiditat concurrü eir las seguaintas duos circonstantias, cioè: Avant 5 onns haveiva la lavina da Nudigls manà gio bod tuot il guaud della Tscheppa nels Puntins aint il let dal flüm. In quella not l'agua ha pudü alvantar üna gronda part da quel linom e sdrapar cun sai. Fond quaist linom plü 'n oura ferma resistantia a l'agua schi ha quaista d'inmez in oura da Sassè, ingio's disch la bouda (la quala ais causada dallas aguazuns anterius), maglià aint per il munt, chi ais tuot siblun. Lura quaist ais dat gio aint in l'agua, et our da que ais naschü üna bouda furiusa; tras il munt da Spadlas fuo quella büttada vers Mulinas e da qua vers la peidra grossa, ingio ella storschet l'archia fatta a defaisa dellas chasas da Grava. Da qua davent giet ella, laschond davo siblun et implind il vieu, darcheug via vers las Ognias. Il grös dall'agua l'incontra passet furiusamaing sper las chasas da Grava oura, usche alvantà chia 'ls buogls surmunteivan las rivas, magliett sot aint il mür del terz edifici gniond da Grava oura sot via, chi presaintamaing ais da Nuot Camenisch,\* sainza cha'l mür dess gio, per fortüna! Passà quaista chasa rivet l'elemaint furibund prols tablats da sar Curdin Rosler, chi passeivan oura ün toc alla chiasa antecedainta, e sdrapet davent quels insembel cun la quarta d'fain, ils cuntschets, üna puntetta per peduns chi maneiva suravia in ün hiert e bogn dal dit Rosler, sco eir ils horts da N. Camenisch e C. Rosler. La resistantia, chi fet all'agua tuot quaista massa pro la punt d'stadaira, chi non pudeiva dar lö schabain chia l'agua gieiva sur ell'oura, fet chia l'agua fuo büttada cunter l'hiert da sar Curdin Rosler, chi eira da man sneister del flüm, magliet davent quel sco eir ün auter hiert, a quel coherent, da sar Peider J. Cazin. Eir sdrapet 'la cun sai il

\* Que ais la chasa, chi restet unica intacta nel incendi da Grava dals 3 November 1900. (Annotaziun del editur.)

tablà cun üna gronda quarta d' fain, eir la stalla, ün schler, chadafö e chaminada da quaist ultim, chi per furtüna, veziond la saira avant il privel, haveiva per temp tut oura bain blera raba. Quaist ais l'unica chasa, chi eira amo tanter las aguas, coherente al mulin uschedit sün punt. Passada chi fuo la punt d'stadaira battet l'agua cunter la chasa da sar Jachen Not Pitschen Bonorand,\* chi ais be sper ditta punt, sainza far, per furtüna, grond donn. Ma il hiert e quartin coherents e pertinents a quaista chasa füon slavats davent. Mia chasa, chi nellas aguazuns dals onns 1750 e 1762 ha suffert in hiert e tablà grond donn, fuo per gratia dal omnipotaint Segner miraculusamaing schaniada in quaist chastiamaint, chia ne ün lain dal cuntschet fuo muventà e nianca strat davent ün spizà dal hiert. Sea il autischem ingratia per quaista miracolusa protectiun! Detta El ch'eug et ils meis possan demonstrar nossa recognoschentscha cun üna pietusa vita! Vöglia El preservar na be mai et ils meis e meis convschins, mo eira tuot nossa posteritad da consimils chastiamaints e da talas horriblas nots!

Non ais dit sü sura, chia eir nella chiasa coherente a quella da sar Nuot Camenisch, cioè la seconda gnonid our da Grava (present possessur Joh. Wildhaber), ais nella istessa not tut davent üna chaminada et ün schler. — Tuot quaist ais success in üna suletta not. La daman del di seguaint cumanzet l'agua a chialar e'l chastiamaint fuo levà via. Il vieu suot mia chasa fuo sudetta not impli cun siblun ch' ün pudeiva star a pè süt sün quel. Cün il chialar dall' agua la daman davo magliet ella darcheug tras il vieu vegl.

Scrit tras il possessur della chiasa sot la punt d'stadaira in terza d'imez da man dret

*Jon Jachen G. Planta.*

---

\* Preschaintamaing Hôtel Rhätia. Annotaziun del editur.)

